

# ALL INDIA RADIO

## RNU : KOLKATA

### BENGALI BULLETIN

DATE : 27-06-2017

TIME : 1.40 P.M.

সুপ্রীম কোর্ট, সামাজিক কল্যাণমূলক বিভিন্ন প্রকল্পের সুবিধা লাভের জন্য আধারকার্ড বাধ্যতামূলক করার ব্যাপারে সরকারি নির্দেশিকার উপর অন্তর্বর্তী স্থগিতাদেশ দিতে অস্বীকার করেছে। সর্বোচ্চ আদালত আজ এই মামলার শুনানির সময় এ ব্যাপারে ৯ ই জুন তার আগেকার নির্দেশের উল্লেখ করে বলেছেন, এক্ষেত্রে নতুন করে আর কোনও পর্যবেক্ষণের প্রয়োজন নেই।

দুই বিচারপতি এ.এম. খান উইলকার ও নবীন সিনহার অবকাশকালীন বেঞ্চ বলেছেন, আধার না থাকার কারণে একশ্রেণীর মানুষ সামাজিক সুবিধে থেকে বঞ্চিত হতে পারেন। শুধুমাত্র এই আশঙ্কার ভিত্তিতে বর্তমান পরিস্থিতিতে কেন্দ্রের নির্দেশের উপর স্থগিতাদেশ জারির কোনও প্রশ্ন ওঠে না। তবে আধারকার্ড ব্যবহারের ফলে নিরাপত্তা লঙ্ঘিত হচ্ছে কিনা তা খতিয়ে দেখার জন্য একটি সাংবিধানিক বেঞ্চকে যে দায়িত্ব দেওয়া হয়েছে সেই রিপোর্ট না পাওয়া পর্যন্ত এই কর্মসূচী রূপায়ণের উপর আংশিক স্থগিতাদেশ সর্বোচ্চ আদালত বহাল রেখেছে।

মামলার পরবর্তী শুনানির দিন ধার্য হয়েছে ৭ ই জুলাই।

০০০০০০

গোখাঁ জনমুক্তি মোর্চার ডাকা লাগাতার বনধে আজ ত্রয়োদশ দিনেও দার্জিলিংয়ের জনজীবন বিপর্যস্ত। আমাদের জেলা সংবাদদাতা স্বপন পাল জানান, দার্জিলিং স্টেশন থেকে চকবাজারে আজ সকাল ১০ টা নাগাদ মোর্চার এক বিশাল মিছিল এসে পৌছয়। জিটিএ চুক্তিপত্র পুড়িয়ে মোর্চা সমর্থকরা সেখানে

বিক্ষোভ দেখাতে থাকেন। যুবমোর্চার বেশ কয়েকজন সমর্থক পিঠে টিউবলাইট ভেঙে প্রতিবাদ জানান। একই সঙ্গে কার্শিয়াং, কালিম্পং এবং মিরিকেও মোর্চা মিছিল বের করে। দার্জিলিংয়ের চারটি মহকুমার পদস্থ পুলিশ আধিকারিকরা ঘটনাস্থলে রয়েছেন। পরিস্থিতির ওপর তীক্ষ্ণ নজর রাখা হচ্ছে। মোর্চার মিছিলের আগে এবং পরে বিশাল পুলিশ বাহিনী রাখা হয়েছে বলে আমাদের সংবাদদাতা আরো জানিয়েছেন।

এদিকে, সমতলে জিজেএম-এর নেতা শঙ্কর অধিকারী বলেছেন, এই আন্দোলনের নেতৃত্বে এখন জনতা রয়েছে তাই, কোনো দলের পক্ষেই এর রাশ নিয়ন্ত্রণ করা সম্ভব নয়।

অন্যদিকে, গোর্খা জনমুক্তি মোর্চার পক্ষ থেকে রামবন, বিন্দুর মতো জলবিদ্যুৎ কেন্দ্রগুলি থেকে ভবিষ্যতে বিদ্যুৎ সরবরাহ বন্ধ করার হুঁশিয়ারী দেওয়া হয়েছে।

০০০০০০

দক্ষিণ ২৪ পরগণার বাসন্তীর লেবুখালিতে এলাকা দখলকে কেন্দ্র করে আজ সকালে তৃণমূল কংগ্রেসের দুই গোষ্ঠীর মধ্যে সংঘর্ষে পরিস্থিতি উত্তপ্ত হয়ে ওঠে। দু-পক্ষের মধ্যে যথেষ্ট বোমা-গুলি চলে। এতে একজন গুলিবিদ্ধ হন। আহত আরও তিনজন। এদের সকলকেই বাসন্তী হাসপাতালে ভর্তি করা হয়েছে। এলাকায় উত্তেজনা থাকায় পুলিশ আধিকারিকরা ঘটনাস্থলে রয়েছেন। এই ঘটনায় চারজনকে গ্রেপ্তার করা হয়েছে।

০০০০০০

মুর্শিদাবাদের ডোমকল থানার কুসাবেড়িয়ায় দুষ্কৃতিদের গুলিতে এক তৃণমূল কংগ্রেস কর্মী খুন হয়েছেন। পুলিশ জানিয়েছে, বছর ৩৫-এর রেন্টু গত সন্ধ্যায় মোটর সাইকেলে চেপে বাড়ি আসার সময় কয়েকজন দুষ্কৃতি তাকে থামতে বলে।

তারপর তাকে লক্ষ্য করে গুলি ছোঁড়া হয়। স্থানীয় মানুষজন ডোমকল হাসপাতালে নিয়ে যাবার পথেই রেন্টুর মৃত্যু হয়। গোষ্ঠীদ্বন্দ্বের কারণেই এই খুন বলে পুলিশের প্রাথমিক অনুমান। দুষ্কৃতীদের সন্ধানে তল্লাশি শুরু হয়েছে।

০০০০০০

মুর্শিদাবাদের ডোমকল থানা এলাকায় ছেলেধরা সন্দেহে এক মহিলাকে স্থানীয় বাসিন্দারা গণপ্রহার করে। গুরুতর আহত অবস্থায় পুলিশ তাকে উদ্ধার করে ডোমকল হাসপাতালে নিয়ে যায়। পুলিশ সূত্রে জানা গেছে, গত কয়েকদিন ধরেই তাকে এলাকায় ঘুরতে দেখা যায়। আজ তাকে দেখতে পেয়েই সাধারণ মানুষ ঘিরে ধ'রে মারতে শুরু করে।

০০০০০০

ভূষণ সিং, কোচবিহার পুরসভার নতুন চেয়ারম্যান নির্বাচিত হয়েছেন। আজ ১৯ জন কাউন্সিলরের মধ্যে ১১ জনের ভোট তিনি পেয়েছেন। এর মধ্যে ৯ জন তৃণমূল কংগ্রেস কাউন্সিলর এবং ২ জন নির্দল কাউন্সিলর। বামপ্রার্থী মহানন্দ সাহা তাদের ৮ কাউন্সিলরের ভোট পেয়েছেন।

উল্লেখ্য, সম্প্রতি তৃণমূল কংগ্রেস পরিচালিত কোচবিহার পুরসভার চেয়ারপার্সন রেবা কুঞ্জুর বিরুদ্ধে দুর্নীতির অভিযোগ ওঠায় তিনি পদত্যাগ করেন।

০০০০০০

নদীয়ার কৃষ্ণনগরে গাড়ির ধাক্কায় এক পুলিশকর্মীর মৃত্যু হয়েছে। পুলিশ জানিয়েছে, বুদ্ধদেব কুঞ্জু নামে ওই পুলিশকর্মী সকালে বাইকে চেপে পুলিশ সুপারের অফিসে যাচ্ছিলেন। সেসময় একটি গাড়ি তাকে ধাক্কা মারে। গুরুতর আহত অবস্থায় শক্তিনগর হাসপাতালে নিয়ে যাওয়া হলে সেখানেই তাঁকে চিকিৎসকরা মৃত বলে ঘোষণা করেন। পুলিশ গাড়িটিকে আটক করেছে। চালক

পলাতক। প্রত্যক্ষদর্শীরা অবশ্য জানিয়েছে, ওই পুলিশকর্মীর মাথায় হেলমেট ছিল না।

০০০০০০

পূর্ব মেদিনীপুরের হলদিয়ার চিরঞ্জীবপুর নবপল্লীতে গতরাতে, জোরে মাইক বাজানোর অভিযোগে পুলিশ ২ জনকে গ্রেপ্তার করেছে। মনসাপুজো উপলক্ষে অনেক রাত পর্যন্ত সেখানে অনুষ্ঠান চলছিল বলে জানা গেছে। পুলিশ সুপার অলোক রাজোরিয়া জানিয়েছেন, ডিজে বক্স এবং অন্যান্য সরঞ্জাম আটক করা হয়েছে।

০০০০০০

নদীয়ার গাংনাপুর থানার হোমানিয়াপোতা গ্রামে বিদ্যুৎস্পৃষ্ট হয়ে দুই ভাইয়ের মৃত্যু হয়েছে। ৪৮ বছরের শৈলেন অধিকারী ও তাঁর ভাই বছর ৪২-এর পুলিন গতসন্ধ্যায় বাড়ির কাছে পানের বরজে কাজ করছিলেন। পাশেই বিদ্যুতের খুঁটি থেকে তার ছিঁড়ে পড়ে। বরজে ঘেরা তারের সঙ্গে বিদ্যুতবাহী ওই তারের সংযোগ ঘটলে দুজনেই বিদ্যুৎস্পৃষ্ট হন।

প্রথমে পুলিনকে মাটিতে পড়ে থাকতে দেখে এলাকার লোকজন তাঁকে গাংনাপুর হাসপাতালে নিয়ে যান। চিকিৎসকরা তাঁকে মৃত ঘোষণা করেন। পরে, শৈলেনকে মৃত অবস্থায় পানের বরজের মধ্যেই পাওয়া যায়।

০০০০০০

বর্ধমান আদালতে এক কিশোরীকে ধর্ষণের অভিযোগে বিশ্বজিৎ হালদার নামে এক যুবককে ২ দিনের বিচারবিভাগীয় হেফাজতে পাঠানোর নির্দেশ দিয়েছে। আগামীকাল তাকে শিশুদের উপর যৌন নির্যাতন সংক্রান্ত বিশেষ আদালতে তোলার নির্দেশ দেওয়া হয়েছে। পুলিশ সূত্রে জানা গেছে, ১৮ই জুন থেকে ২৩শে জুন, পূর্ব বর্ধমান জেলার বেচারহাটের বাসিন্দা বিশ্বজিৎ ঐ

কিশোরীকে কয়েকবার ধর্ষণ করে বলে অভিযোগ। রবিবার মেয়েটির অভিযোগের ভিত্তিতে বর্ধমান মহিলা থানার পুলিশ ওই যুবককে গ্রেপ্তার করে।

০০০০০০

গ্যাংটক থেকে আজ মানস সরোবর তীর্থযাত্রীদের তৃতীয় দলটির আজ যাত্রা শুরু কথার কথা ছিল। কিন্তু চীন অনুমতি না দেওয়ায়, যে ৪৭ জন তীর্থযাত্রীর নাথুলা দিয়ে চীনে পৌঁছানোর কথা ছিল, তাঁরা শনিবার গ্যাংটক ফিরে আসেন। এবছর ৭ টি দলে মোট ৭০০ জন তীর্থযাত্রীর যাওয়ার কথা ছিল। নতুন দিল্লীর একটি সূত্রে জানা গেছে, এব্যাপারে চীনের সঙ্গে কথা বলা হচ্ছে।

০০০০০০

রাজস্থান থেকে বঙ্গোপসাগর পর্যন্ত বিস্তৃত নিম্নচাপ অক্ষরেখার প্রভাবে কলকাতা সহ রাজ্যের প্রায় সর্বত্র আজও সারাদিনে বজ্রবিদ্যুৎ সহ বিক্ষিপ্ত বৃষ্টির সম্ভাবনা রয়েছে। তবে ভারী বৃষ্টির তেমন পূর্বাভাস নেই বলে আলিপুর আবহাওয়া দপ্তর জানিয়েছে।

কলকাতায় আজ সকালে সর্বনিম্ন তাপমাত্রা রেকর্ড করা হয় ২৭ দশমিক ৩ ডিগ্রি সেলসিয়াস। যা স্বাভাবিকের তুলনায় ১ ডিগ্রি বেশী। গতকাল সর্বোচ্চ তাপমাত্রা অবশ্য ছিল স্বাভাবিক। ৩৩ দশমিক ১ ডিগ্রি সেলসিয়াস। সকাল সাড়ে ৮ টা পর্যন্ত গত ২৪ ঘন্টায় বৃষ্টি হয়েছে ২ দশমিক ৮ মিলিমিটার।

-----